

景明刻本鹽邑志林

聖門志卷之三上

海鹽呂元善纂輯

海澄周起元

參考

商丘李躍龍

兄呂元美

編次

侄呂濬

男呂兆祥

訂閱

孫呂逢時

四氏封典

姓譜世紀
顯裔附

叙曰自戰國魏安釐王封孔子後爲魯國文信

聖門志 卷三
君後累朝封號不一宋仁宗至和二年始封爲
衍聖公哲宗元符元年又改封奉聖公徽宗崇
寧三年復封爲衍聖公

國朝洪武元年詔封衍聖公世襲鑄降銀印十年
設襲封府衙門每遇萬壽聖節赴京朝賀又奉
旨准額設官屬人等宜從衍聖公保舉堪用人數
具呈都省以憑銓用景泰三年詔顏氏宗子
世襲五經博士嘉靖十八年欽授曾子後世
襲五經博士弘治十六年題准子思子奉祀
書院博士世以衍聖公次子承襲正德元年設

衢州府世襲五經博士景泰三年欽授孟子後
世襲五經博士每歲萬壽博士赴京慶賀萬曆
四十二年奏討博士印奉 旨下部候給洪武
元年 詔世襲曲阜知縣管理邑務惟選賢能
者授職不以世次承襲著爲令甲宣德元年三
氏學錄始以聖裔任尼山洙泗書院前代各設
山長奉侍香火正德二年奏 准改山長職銜
爲學錄嗟夫運會推移陵谷遷改皇王之胤或
夷爲編氓名謚無稽而四氏之後高爵厚祿安
富尊榮與天地相爲悠久余因捃摭國史叅考

家乘論次而傳列之令纂服者庶幾盛美有彰而誦法者不患文獻無徵矣今以四氏之姓譜國朝之世官歷代之科目貢監聞達俱備錄焉

世襲職銜

聖公府孔氏襲封衍聖公一人翰林院顏氏世襲五經博士一人曾氏世襲五經博士一人孔氏世襲五經博士二人孟氏世襲五經博士一人孔氏世襲曲阜縣知縣一人四氏學學錄一人尼山書院學錄一人洙泗書院學錄一人孔庭族長一人林廟舉事一人

孔氏姓譜

先師孔子黃帝之後也黃帝生玄囂玄囂生蟠極
蟠極生帝嚳帝嚳生契唐堯之臣佐禹治水有功
始封于商賜姓子是爲子姓之祖契生昭明昭明
生相土相土生昌若昌若生曹圉曹圉生冥冥生
振振生微微生報丁報丁生報乙報乙生報丙報
丙生主壬主壬生主癸主癸生天乙是爲成湯革
夏而有天下天乙生太丁太丁生太甲太甲生太
庚太庚生太戊太戊生河亶甲河亶甲生祖乙祖
乙生祖辛祖辛生祖丁祖丁生小乙小乙生武丁

武丁生祖甲祖甲生庚丁庚丁生武乙武乙生太
丁太丁生帝乙當周武王克商時封帝乙之子微
子啓國于宋以奉湯祀啓卒傳弟思衍號曰微仲
微仲生宋公稽宋公稽生丁公申丁公申生湑公
熙湑公熙生弗父何遜國于弟厲公何世爲宋卿
厲公何生宋父周宋父周生世父勝世父勝生正
考父三命益共又得商頌于周太師歸以祀其先
王正考父生孔父嘉五世親盡別爲公族始以孔
爲氏焉孔父嘉生木金父木金父生畢夷畢夷生
防叔避華督之難奔魯防叔生伯夏伯夏生叔梁

紇仕爲陳大夫初娶魯施氏有九女而無子其妾
生孟皮字伯尼有足疾不任祀事乃求婚于顏氏
顏氏有三女其父問曰陳大夫父祖爲卿士實先
聖王之裔今其人身長十尺武力絕倫吾甚貪之
雖年高姓嚴不足爲疑三子孰能爲之妻二子莫
對其幼徵在進曰從父所制將何問焉父曰卽爾
能矣遂以妻之顏氏禱于尼丘之山升之谷草木
之葉皆上起降之谷草木之葉皆下垂及懷姙十
一月而生先聖于周靈王二十一年庚戌十月二
十一庚子日甲申時卽今之八月二十七日是夕

有二龍繞室五老降庭五老者五星之精也顏氏
之房聞鈞天之樂空中有聲云天感生聖子故降
以和樂之音生而首上圜頂因名丘字仲尼有異
質其眉一十二彩目六十四理立如鳳峙坐如龍
蹲手握天文足履度字望之如什就之如升視若
營四海躬履謙讓胸有文曰制作定世符身長九
尺六寸腰大十圍享年七十三歲薨于周敬王四
十一年壬戌四月乙丑日卽今之二月十八日至
國朝萬曆四十一年癸丑凡二千九十有六年也

宗子世紀

二代孔鯉字伯魚生于周景王十三年己巳適魯
昭公以二鯉魚賜孔子榮君之貺因以名其子
早聞過庭之訓旣長魯哀公以幣召稱疾不行
年五十歲卒于周敬王三十七年戊午生子伋
三代孔伋字子思卒年六十有二生子白詳具四
配列傳不重書

四代孔白字子上請所習于子思子思曰先人有
訓焉學必由聖所以致其才也礪必由砥所以
致其刃也故夫子之教必始于詩書而終于禮
樂雜說不與焉齊威王召白爲國相卒年四十

有九生子求

五代孔求字子家楚召不受卒年四十五生子箕
六代孔箕字子京爲魏相年四十六卒生子穿
七代孔穿字子高楚魏趙三國交聘不就著儒家
之語十二篇名曰讜言年五十一卒生子謙

八代孔謙字子順仕魏爲安釐王相改嬖寵之官
以事賢奪無任之祿以賜有功諸喪職秩者不
悅相魏九月以病致仕遂寢于家嘗曰今秦有
吞天下之心不出二十年天下其盡爲秦乎秦
莊襄王召不行魏以孔子後封魯國文信君年

五十七卒生子三鮒騰樹

以上俱一子相承惟至九世始有三子焉

九代孔鮒字子魚秦始皇召爲魯國文通君拜少

傅三十四年丞相李斯始議焚書與弟騰藏其

家語論語尚書孝經等於祖堂舊壁中自隱於

嵩山教弟子百餘人後陳涉爲楚王聘爲太傅

凡仕六月託疾而退年五十七卒於陳下著書

二十餘篇名曰孔叢子生子隨字元路六傳至

安嗣絕鮒弟騰字子襄身長九尺六寸漢高帝

過魯封爲奉嗣君以奉孔子祀後爲惠帝博士

遷長沙太守年五十七卒生子忠

按封孔子後裔奉祀始此

十代孔忠字子貞徵爲博士封褒城侯年五十七卒生子二長武次安國

十一代孔武字子威爲漢文帝博士至臨淮太守早世卒生子延年

十二代孔延年博覽羣書漢武帝時爲博士轉少傅遷大將軍年七十一卒生子霸

十三代孔霸字次孺幼有奇才漢昭帝時爲博士宣帝時以大中大夫授皇太子經遷詹事爲高密相元帝卽位拜太師賜爵關內侯食邑八百戶號褒成君給事中賜黃金二百斤宅一區徙

名數于長安爲人謙退嘗稱位祿太過何德以堪之帝欲致之相位讓至三四帝知其誠乃止上書求奉先聖祭詔令以所食邑祀孔子享年七十二卒於第帝素服臨吊者再至賜東園秘器錢帛策贈列侯謚曰烈生子四福捷喜光

十四代孔福襲封關內侯年六十三卒生子房

十五代孔房漢哀帝時襲封關內侯食邑八百戶生子均

十六代孔均字長平初名莽避王莽改今名敦篤好學有大才襲封關內侯徵拜尚書郎言辭清

辨奏對成章漢平帝元始元年改封褒成侯食邑二千戶五年王莽篡位拜太尉不就三辭疾

乃得還年八十一卒生子志

按自漢以來雖以聖裔寵異之猶未

襲封也至十三代霸封關內侯傳十四代福十五代房俱嗣侯雖襲封矣猶稱關內侯是爲尊帝師而封也至平帝始改封均爲褒成侯則專爲奉先聖而封矣自是封爵世世不絕

十七代孔志漢光武初拜大司馬建武十四年襲

封褒城侯食邑二千戶卒謚元成生子損

十八代孔損字君益漢明帝永平十五年襲封褒

成侯章帝元和二年東巡狩詔褒成侯助祭和

帝永元四年改封褒亭侯食邑一千戶生子曜

十九代孔曜字君曜襲封褒亭侯生子二完讚

二十代孔完襲封褒亭侯早卒嗣絕以弟讚之子

羨襲封

二十一代孔羨字子餘魏文帝黃初元年拜議郎
改封宗聖侯以魯縣百戶奉祀生子震

二十二代孔震字伯起晉文帝泰始三年改封奉
聖亭侯拜太常卿黃門侍郎食邑二千戶年七
十五卒生子疑

二十三代孔疑字功成襲封奉聖亭侯食邑二千
戶年五十七卒生子撫

二十四代孔撫舉孝廉辟太尉掾襲封奉聖亭侯
爲豫章太守食邑一千戶生子懿

二十五代孔懿襲封奉聖亭侯從事中郎食邑一
千戶年六十一卒生子鮮

二十六代孔鮮字鮮之恢廓大度好學善誨宋文
帝元嘉十九年襲封奉聖亭侯改封崇聖侯生
子乘

二十七代孔乘博學有才後魏舉孝廉文帝延興
三年封崇聖大夫食邑五百戶生子靈珍

二十八代孔靈珍授秘書郎孝文帝太和十九年